

neque ad auditum venerint neque ad cogitationem cordis  
60 ascenderint. Etenim nunc sicut parvulus in vulva matris,  
ita et nos in hoc mundo positi sumus et quasi angustiis  
quibusdam atque obscuritate conclusi futuri saeculi  
lucem libertatemque non possumus intueri. Cum autem  
tempus affuerit ut parturiat nos praesens hic mundus et  
65 omnes quos concepit in futuri saeculi proferat lucem, si  
quos quidem peccatis intervenientibus aborsus immatu-  
ros invenerit de tenebris in tenebras eunt et de angustiis  
ad arctiores angustias redeunt, quos vero perfectos et  
regis imagini similes genuerit, offert Patri sobolem gene-  
70 rosam in officiis angelicis et sedibus archangelicis conlo-  
candam. Noli ergo, quaeso te amice, pertendere in illam  
partem, ubi vultus animae tuae et imago regia corrum-  
patur et velut aborsum quendam in finem te mundus iste  
proiciat, sed citius repara in te imaginem paternam, repara  
75 virtutum decus et speciem ut inter filios agnoscaris a  
Patre. Etenim pulcritudinem corporis Deus certis qui-  
busdam et naturalibus terminis clausit, animae autem  
pulcritudinem liberam fecit et nulla sub necessitate con-  
clusam, utpote multo praestantiorum decore corporeo.  
80 Haec ergo animae species in libertate est sub Dei quidem  
nutu, in nostris tamen manibus posita. Nam si etiam cor-  
porei decoris potestatem Dominus nostro ita permis-  
set arbitrio, sollicitudo nobis immineret superflua atque  
in his quae nihil prodessent omne vitae nostrae tempus  
85 occuparemus, ex quo cultus animae necessario neglegere-  
tur. Quippe qui etiam nunc ubi nulla nobis potestas est  
conferendi aliquid corporis decori, hoc tamen agimus et